

गलातियां नै कागद

1 पौलुस कांनी सूँ जकौ अेक प्रेरित है। वौ अेक अेडौ वरत धारण कर्यौ है, जकौ उणनै ना तौ मिनखां सूँ मिळ्यौ है अर ना किणी अेक मिनख उणनै दियौ है। औ तौ यीशु मसीह कांनी सूँ उण परम पिता परमेसर सूँ दिरीज्यौ है जकौ यीशु मसीह नै मर्योडां मांय सूँ पाछौ जीवतौ कर दियौ हौ। **2**अर म्हारै सागै जका भाई है, वां सगळां कांनी सूँ गलातिया ^a खेत्र री कलीसिया रै नांव:

3म्हारै परम पिता परमेसर अर प्रभु यीशु मसीह कांनी सूँ थानै मेहर अर सांति मिळै। **4**जकौ म्हारै पापां सारू अपणै आपनै समरपित कर दियौ जिणसूँ के इण पापी संसार सूँ, जिणमें म्हे रैय रेया हां, वौ म्हानै छुटकारौ दिराय सके। म्हारै परम पिता री आ इज इच्छा है। **5**वौ सदां-सदां सारू महिमामान होवै, आमीन!

साचौ सुभसंदेस अेक इज है

6म्हनै अचरज है के थे लोग इतौ बेगौ उण परमेसर सूँ मूंडौ फोर'र, जकौ मसीह री किरपा सूँ थानै बुलाया हा, किणी दूजै सुभसंदेस कांनी जाय रेया हौ। **7**असल बात तौ आ है के कोई दूजौ सुभसंदेस है इज कोनी। पण की लोग अेडा है जका थानै भरमाय रेया है अर मसीह रै सुभसंदेस में हेर-फेर रौ जतन कर रेया है। **8**पण चाये म्हे होवां के भलाई कोई सुरगदूत, जे थानै म्हारै कांनी सूँ सुणाईज्यै सुभसंदेस सूँ अलायदौ कोई सुभसंदेस सुणावै तौ उणनै धिक्कार है। **9**जियां के म्हे पैलां ई कैय चुक्या हां, वौ इज म्हे अेकर फेरू दुसराऊं हूँ के चाये म्हे होवौ अर चाये कोई सुरगदूत, जे थारै सांभळ्योडै सुभसंदेस सूँ दूजौ कोई सुभसंदेस सुणावै है तौ उणनै धिक्कार है।

10काई इणसूँ थानै औ लखावै है के म्हे मिनखां रौ समरथन चाऊं हूँ? के पछै म्हे औ चाऊं हूँ के म्हनै

परमेसर रौ समरथन मिळै? तौ पछै काई म्हे मिनखां नै राजी करण री आफळ करूँ हूँ? जे म्हे मिनखां नै राजी करतौ तौ म्हे मसीह रौ सेवक सरीखौ नीं होवतौ।

पौलुस रौ सुभसंदेस परमेसर सूँ मिळ्योडौ

11हे भायां, म्हे थानै जतावणौ चाऊं हूँ के वौ सुभसंदेस जिणरौ उपदेस थानै म्हे दियौ हूँ, **12**कोई मिनख सूँ हासल सुभसंदेस नीं है, क्यूँके ना तौ म्हे औ किणी मिनख सूँ हासल कर्यौ है अर ना कोई मिनख म्हनै इणरी सीख दीनी है। बल्के दैवी संदेस रै रूप में औ मसीह रै भेज्योडौ म्हारै सांम्ही प्रगट होयौ है।

13यहूदी धरम मांय म्हे पैली किण भांत जीवतौ हौ, वौ थे सुण ई लियो अर थे औ ई जाणौ हौ के म्हे परमेसर री कलीसिया माथे कितौ अत्याचार कर्यौ है अर उणनै उजाड़ण रौ जतन पण कर्यौ है। **14**यहूदी धरम मानण मांय म्हे म्हारै जुग रा समकालीण यहूदियां सूँ आगै हौ क्यूँके म्हारा बडेरां सूँ जकी परम्परावां म्हनै मिळी ही, वां मांय म्हारी उछाव भरी आस्था ही।

15पण परमेसर तौ म्हारै जलम सूँ पैलां ई म्हनै टाळ लियो हौ अर आपरी किरपा में म्हनै बुलाय लियो हौ, **16**इण वास्ते के वौ म्हनै पूत रौ ग्यान कराय देवै अर म्हे गैर यहूदियां रै बिचाळे उणरै सुभसंदेस रौ प्रचार करूँ। उण बगत तौ म्हे किणी मिनख सूँ कोई राय नीं ली। **17**अर ना ई म्हे वां लोगां रै कनै यरूशलेम गियौ जका म्हासूँ पैलां प्रेरित बणिया हा। म्हे तौ अरब कांनी गियौ अर पछै बटे सूँ दमिशक आयग्यौ।

18फेर तीन बरसां पछै पतरस सूँ मिळण सारू म्हे यरूशलेम पूय्यौ अर उणरै सागै अेक पखवाडै ताई ठैर्यौ। **19**पण बटे म्हे प्रभु रै भाई याकूब रै टाळ दूजै किणी प्रेरित सूँ नीं मिळ्यौ। **20**म्हे परमेसर रै सांम्ही सौगन खाय'र केऊं हूँ के जकौ कीं म्हे लिख रेयौ हूँ उणमें कूड़ रौ नांव नीं है। **21**उणरै पछै म्हे सीरिया अर किलिकिया रा प्रदेसां में गियौ।

22पण यहूदियां रै मसीह नै मानण वाळा कलीसिया निजू रूप सूँ म्हनै ओळखता नीं हा। **23**पण वै लोगां

^a 1:2 गलातिया स्यात औ वौ इज खेत्र होवैला जटै आपरी पैली धारमिक सेवा-जात्रा रै टाणै पौलुस उपदेस दियौ हौ अर कलीसिया री थापना करी ही। देखी—प्रेरितां रा काम 13 अर 14

नै कैवता सुणता, “वौ इज आदमी जकौ पैली म्हानै अदावतौ हौ, अबै उणी विस्वास मतळब कै उणी मत रौ झंडौ लियां फिरै है, जिणनै पैलां वौ खतम करण री आफळां करी ही।” 24म्हारे कारण वां परमेसर री स्तुति करी।

पौलुस नै प्रेरितां री मान्यता

2 चवदे साल पछे म्हें पाछौ यरूशलेम गियो। बरनाबास म्हारे सागै हौ अर तितुस नै ई म्हें सागै लेय लियो हौ। 2म्हें परमेसर रा दिव्य दरसणां सारू बठे गियो हौ। म्हें गैर यहूदियां रै बिचाळै जिण सुभसंदेस रौ उपदेस दिया करूं हूँ, वौ इज सुभसंदेस म्हें अेक निजू सभा बिचाळै कलीसिया रै मुखियावां नै सुणायो। म्हें बठे इण वास्ते गियो हौ कै परमेसर म्हनै दरसायो हौ कै म्हें बठे जावणौ चाईजै। जिणसूँ कै जकौ काम म्हें लारलै दिनां कस्यौ हौ, या जिणनै म्हें कर रैयो हूँ, वौ अकारथ नीं जावे परौ।

3फळसरूप तितुत तक नै, जकौ म्हारे सागै हौ, हालांके वौ यूनानी है, फेरू ई उणनै खतना करावण सारू मजबूर नीं करीजियो। 4पण वां झूठा बंधुवां रै कारण आ बात उठी, जका ओले-छानै म्हारे बिचाळै भेदू बणियोडा यीशु मसीह मांय म्हारी सुतंतरता रौ पतौ लगावण सारू इण वास्ते घुसया हा कै म्हानै दास बणाय सके। 5पण म्हे वारी ताबेदारी मांय गोडा नीं टेकिया, इण वास्ते कै वौ साचौ सुभसंदेस थारै मांय बण्यौ रैवे।

6पण चावा-ठावा बाजण वाळा लोगां सूं म्हानै कीं नीं मिळ्यौ। (वै कैड़ा ई व्हौ, म्हारे कीं फरक नीं पड़े। बिना किणी भेदभाव रै सगळा मिनख परमेसर आगळ अेक जैड़ा है।) वां मौजीज लोगां सूं म्हनै कै म्हारे सुभसंदेस नै कोई नफे नीं व्हियो। 7पण आं मुखियावां देख्यौ कै परमेसर म्हनै उणी भांत अेक खास काम सूंप्यौ है जिण भांत पतरस नै परमेसर यहूदियां नै सुभसंदेस सुणावण रौ काम सूंप्यौ हौ। पण परमेसर गैर यहूदी लोगां नै सुभसंदेस सुणावण रौ जिम्मौ म्हनै सूंप्यौ। 8परमेसर, पतरस नै अेक प्रेरित रै रूप काम करण री सगती दी ही। पतरस गैर यहूदी लोगां सारू अेक प्रेरित है। परमेसर म्हनै ई अेक प्रेरित रै रूप में काम करण री सगती दी है। पण म्हें वां लोगां रौ प्रेरित हूं जका यहूदी कोनी। 9इण भांत वां म्हारे माथै परमेसर

री उण किरपा नै समझया हा अर कलीसिया रा थम्ब मानीजण वाळा याकूब, पतरस अर यूहन्ना बरनाबास अर म्हासूं बेलीपा री बांनगी सरूप हाथ मिळाय लियो। वै इण बात नै मानली कै म्हे विधरमियां रै बिचाळै उपदेस देवता रैवां अर वै यहूदियां रै बिचाळै। 10वां म्हासूं फगत औ इज कैयौ कै गरीब-गुरबां रौ ध्यान राख्या। अर म्हें तौ इणीं ज काम नै नीं फगत करणौ चावतौ बल्के इण सारू हरखबावळौ हौ।

पौलुस री दीठ में पतरस गळत

11पण जद पतरस अन्ताकिया आयौ तौ म्हें चौड़े-धाड़े उणरी खिलाफत करी, क्यूँके वौ गळत हौ। 12क्यूँके याकूब री तरफ सूं भेज्योडा कीं लोगां रै अठै पूगण सूं पैलां वौ यहूदियां सूं खावतौ-पीवतौ हौ। पण वां लोगां रै आयां पछे वौ गैर यहूदियां सूं आपरौ हाथ खांच लियो अर खुद वां सूं किनारी कर लियो। वौ वां लोगां सूं डरतौ थकौ अैडी कस्यौ जका चावता हा कै गैर यहूदियां रौ ई खतनौ होवणौ चाईजै। 13दूजा यहूदियां ई इण दिखावे में उणरौ सागौ दियो। अठै तांई कै इण दिखावै रै कारण बरनाबासा ई भरमीज्यौ। 14म्हें जद औ देख्यौ कै सुभसंदेस में समायोडै साच मुजब वै सीधे मारग नीं चाल रेया है तौ सगळां रै सांम्ही पतरस कैयो, “जद थे यहूदी होय” रै ई गैर यहूदी जैडी जीवण जीवौ हौ, तौ पछे गैर यहूदियां नै यहूदियां री रीत माथै चालण सारू मजबूर कियां कर सकौ हौ?”

15म्हे तौ जलमजात यहूदी हां। म्हारौ पापी गैर यहूदी सूं कीं सगपण कोनी। 16फेरू ई म्हां औ जाणां हां कै किणी आदमी नै वैवस्था रै विधान री पाळणा करण रै कारण नीं बल्के यीशु मसीह में विस्वास रै कारण नेक ठैरायो जावै। म्हां इण वास्ते यीशु मसीह रौ विस्वास धार्यौ है कै इण विस्वास रै कारण म्हे नेक बाजां, इण वास्तै नीं कै वैवस्था रै विधान री पाळणा रै कारण। क्यूँके उणरी पाळणा सूं तौ कोई आदमी धरमी नीं व्है सके।

17पण जे म्हे लोग ई जका कै यीशु मसीह में आपरी स्थिति रै कारण धरमी ठैराईजणौ चावां हा, म्हे इज विधरमियां रै ज्यूं पापी दीखां, तौ कांई इणरौ अरथ औ नीं है कै मसीह पाप नै बधावौ देवै। पक्कायत नीं। 18जे जिणनै म्हें छोड-छिटकाय चुक्यौ हूं, उण रीत रौ पाछौ उपदेस देवण लागूं तौ म्हें आग्या नै

लोपणियों अपराधी बण जाऊंला। **19**क्यूंके वैवस्था रै विधान मुजब वैवस्था सारू तौ म्हें मर चुक्यौ, जिणसूं कै परमेसर सारू म्हें पाछौ जी जाऊं, मसीह रै सागै म्हने क्रूस माथे चढाय दियौ है। **20**इणी सूं अबे आगै म्हें जीवतौ नीं हूं पण मसीह म्हारे मांय जीवतौ है। इण वास्तै इण सररीर मांय अबे म्हें जिण जीवण नै जी रैयौ हूं, वौ तौ विस्वास माथे टिक्योडौ है। परमेसर रै उण पूत रै पेटे विस्वास माथे जकौ म्हासूं प्रेम करै अर जकौ अपणै आपने म्हारे सारू अरपित कर दियौ। **21**म्हें परमेसर री किरपा नै नरूं कोनी, पण जे धारमिकता वैवस्था रै विधान सूं परमेसर सूं नातौ जुडाय सकतौ तौ मसीह फालतू अपरा प्राण क्यूं गमावतौ।

परमेसर री वरदान विस्वास सूं मिळै

3 हे मूरख गलातियां! थां माथे कुण कांमण कर नांख्यौ? सगळ्यां रै सांम्ही यीशु मसीह नै क्रूस माथे कियां चढाईज्यौ हौ, थानै तौ आ बात विगतवार बताय दीनी ही। **2**म्हें तौ थांसूं फगत इतरौ जाणणी चाऊं हूं कै थे आतमा रौ वरदान कांई वैवस्था रै विधान री पाळणा सूं हासल कर्यौ हौ, कै सुभसंदेस रै सुणण अर उण माथे भरोसौ करण सूं? **3**कांई थे इत्ता गैला होय सकौ हौ कै जकै जीवण नै थे आतमा सरू कर्यौ, उणनै अबे हाड-मांस रै सररीर री सगती सूं पूरौ करोला? **4**थे इत्ता फोडा कांई फालतू ई देख्या। म्हनै भरोसौ है कै वै फालतू नीं हा। **5**परमेसर थानै जकी आतमा देवै अर जकौ थारे बिचाळै अचरज जोग काम करै, वौ औ सैंग इण वास्तै इज करै कै थे वैवस्था रै विधान नै पाळौ हौ या इण वास्तै कै थे सुभसंदेस नै सुण्यौ है अर उण माथे विस्वास कर्यौ है।

6औ बियां इज है जियां कै इब्राहीम रै विसय मांय शास्त्र कैवै: “वौ परमेसर में विस्वास कर्यौ अर आ उण सारू धारमिकता गिणीजी।”^a **7**तौ फेर थे आ जाणलौ, इब्राहीम रा साचा वंसज वै इज है जका विस्वास करै। **8**शास्त्र पैलां ई बताय दियौ हौ, “परमेसर गैर यहूदियां नै ई वारे विस्वास रै कारण धरमी ठैरावैला। अर आं सबदां रै सागै पैलां सूं इज इब्राहीम नै परमेसर कांनी सूं सुभसंदेस बताईज्यौ हौ।”^b

9इण वास्तै वै लोग जका विस्वास करै है, विस्वासी इब्राहीम रै सागै आसीस पावै है।

10पण वै सगळा लोग जका वैवस्था रा विधानां री पाळणा माथे निरभर रैवै, वै तौ किणी अभिसाप रै आधीन है। शास्त्र में लिख्योडौ है: “अैडै हरेक आदमी नै साप मिळ्योडौ है जकौ वैवस्था रै विधान री पोथी में लिख्योडौ हरेक बात री लगन सूं पाळणा नीं करै।”^c

11अबे औ साफ है कै वैवस्था रै विधान सूं परमेसर रै सांम्ही कोई भी नेक नीं ठैरै। क्यूंके शास्त्र मुजब, “धरमी आदमी विस्वास रै ताण जीवैला।”^d

12पण वैवस्था रौ विधान तौ विस्वास माथे कोनी टिक्योडौ बल्के शास्त्र मुजब, जकौ वैवस्था रै विधान नै पाळैला, वौ वारे इज ताण जीवैला।^e **13**मसीह म्हारे साप नै आपरै ऊपर लेयर वैवस्था रै विधान रै साप सूं म्हानै मुगत कर दिया। शास्त्र कैवै: “हरेक वौ जकौ रूख माथे टांगीज जावै, सापित है।”^f **14**मसीह म्हानै इण वास्तै मुगत कर्या कै इब्राहीम नै दिरीजी आसीस मसीह यीशु कांनी सूं गैर यहूदियां नै ई मिळ सकै ताकि विस्वास रै ताण म्हे उण आतमा नै हासल करां, जिणरौ वचन दिरीज्यौ हौ।

वैवस्था री विधान अर वचन

15हे भायां, अबे म्हें रोजीना रै जीवण सूं अेक दाखलौ देय रैयौ हूं। देखौ, जियां कोई मिनख किणी बात रौ वाचौ कर लेवै, उण मांय सूं ना तौ कीं रद्द कर सकै अर ना ई उण मांय कीं घटायौ-बधायौ जाय सकै। **16**ठीक आ री आ बात इब्राहीम अर उणरै भावी वंसज रै सागै ई करीजी प्रतिग्यारै बाबत ई है। (देखौ, शास्त्र औ नीं कैवै, “अर उणरै वंसजां नै” जे अैडौ होवतौ तौ मोकळा जणां कांनी संकेत होवतौ, पण शास्त्र में अेक वचन बरतीज्यौ है। शास्त्र कैवै है, “अर थारे वंसज नै” जकौ मसीह है।) **17**म्हारे कैवण रौ मतळब औ है कै जिण वचन नै परमेसर पैलां इज तै कर दियौ उणनै चार सौ तीस बरसां पछै आवण वाळौ वैवस्था रौ विधान ई बदळ नीं सकै अर ना ई उणरै वचन नै विलोच्यौ जाय सकै।

^c 3:10 उद्धरण व्यवस्था 27:26

^d 3:11 उद्धरण हबक 2:4

^e 3:12 जकौ वैवस्था ... जीवैला देखौ लैव्य व्यवस्था 18:5

^f 3:13 उद्धरण व्यवस्था विवरण 21:23

^a 3:6 उद्धरण उत्पत्ति 15:6

^b 3:8 उद्धरण उत्पत्ति 12:3

18क्यूंके जे उत्तराधिकार, वैवस्था रे विधान माथे टिक्योडो है तौ पछे वौ वचन माथे नीं टिकेला। पण परमेसर उत्तराधिकार वचन रे मार्फत खुल्ले मन सूं इब्राहीम नै दियो है।

19पछे भला वैवस्था रे विधान रौ उद्देश्य काई रैयो? आग्या लोपण रे अपराध रे कारण वैवस्था रे विधान नै वचन सूं जोड़ीजग्यौ हौ, ताकि जिण खातर वचन दिरीज्यौ हौ, उण वंसज रे आवण ताई वौ बण्यौ रैवे। वैवस्था रौ विधान अेक मध्यस्थ रे रूप में मूसा री सहायता सूं सुरगदत दियो हौ। 20अबै देखौ, मध्यस्थ तौ दो जणां बिचाळै हुवै, पण परमेसर तौ अेक इज है।

मूसा री वैवस्था रे विधान रौ उद्देश्य

21काई इणरौ अरथ औ है कै वैवस्था रौ विधान परमेसर रे वचन रौ विरोधी है? पक्कायत नीं। क्यूंके जे अैडी वैवस्था रौ विधान दिरीजतौ जकी कै लोगां मांय जीवण रौ संचार कर सकतौ तौ वौ वैवस्था रौ विधान इज परमेसर रे सांम्ही धारमिकता नै सिद्ध करण रौ साधन बण जावतौ। 22पण शास्त्र घोसणा करी है कै औ सगळी संसार पाप री सगती रे आधीन है। ताकि यीशु मसीह मांय विस्वास रे आधार माथे जकौ वचन दिरीज्यौ है, वौ विस्वास करणिया सगळां लोगां नै मिळै।

23इण विस्वास रे आवण सूं पैलां, म्हानै वैवस्था रे विधान री सार-संभाव मांय, इण आवण वाळै विस्वास रे प्रगट होवण लग, बंदी रे रूप राखीज्या।

24इण भांत वैवस्था रौ विधान म्हानै मसीह ताई ले जावण सारू अेक कठोर अभिभावक हौ ताकि खुद रे विस्वास रे पाण म्हे नेक बाजां। 25अबै जद औ विस्वास प्रगट व्हे चुक्यौ है तौ म्हे उण करडै अभिभावक रे आधीन कोनी।

26यीशु मसीह माथे भरोसे रे कारण थे सगळा परमेसर री संतान हौ। 27क्यूंके थे सगळा, जका कै मसीह रौ बपतिस्मौ लेय लियौ हौ, मसीह में समायग्या हौ। 28इण वास्तै अबै किणमें ई कोई फरक नीं रैयो। न तौ कोई यहूदी रैयो अर ना कोई गैर यहूदी। ना दास रैयो, ना आजाद। ना मिनख रैयो, ना लुगाई, क्यूंके मसीह यीशु मांय थे सगळा अेक हौ। 29अर क्यूंके थे मसीह रा हौ, तौ पछे थे इब्राहीम रा वंसज हौ, अर परमेसर जकौ वचन इब्राहीम नै दियो हौ, उण वचन रा उत्तराधिकारी हौ।

4¹म्हें कैऊं हूं कै उत्तराधिकारी जद ताई टाबर है तौ भलाई स्सौ-कीं मालक वौ इज होवै, फेरूं ई वौ दास सूं बेसी कीं नीं रैवे। 2वौ आपरे माईतां अर घर रा सेवकां रे तद ताई आधीन रैवे, जद ताई कै उणरे पिता कांनी सूं पक्कौ समे नीं आय जावे। 3म्हारी ई आ इज गत है। म्हे ई टाबर हा जितै सांसारिक नेमां रा दास हा। 4पण जद आछौ अवसर आयौ तौ परमेसर आपरे पूत नै भेज्यौ जकौ अेक लुगाई री कूख सूं जलम्यौ हौ अर वैवस्था रे आधीन जीवतौ हौ। 5ताकि वौ वैवस्था रे आधीन आदम्यां नै मुगत कर सके, जिण सूं आपां परमेसर री गोदी सारू टाबर बण सकां।

6अर पछे क्यूंके थे परमेसर रा पूत हौ, सो वौ थारै हियां मांय पूत री आतमा नै भेजी। वा इज आतमा “हे अब्बा, हे पिता” कैवती थकी हेला मारै। 7इण वास्ते अबै थूं दास नीं है बल्के पूत है अर क्यूंके थूं पूत है, इण वास्तै थनै परमेसर रौ उत्तराधिकारी भी बणाईज्यौ है।

गल्लाती मसीहां सारू पौलुस रौ प्रेम

8पैलां थे लोग जद परमेसर नै जाणता कोनी हा तौ थे लोग देवतावां रा दास हा। वै साच्याणी परमेसर नीं हा। 9पण अबै थे परमेसर नै ओळखौ हौ, कै यूं कैवणौ चाईजे कै परमेसर अबै थानै पिछाण लिया है, तौ पछे थे वां बिरथा अर निबळा नेमां कांनी क्यूं बावड रैया हौ। थे फेरूं उणरे आधीन क्यूं होवणा चावौ हौ? 10थे किणी खास दिनां, महीनां, रितुवां अर बरसां नै मानण लाग्या हौ। 11थारै सारू म्हनै इण बात रौ डर है कै थारै सारू जकौ काम म्हें कर्यौ, वौ सगळी कठैई अकारथ तौ नीं गियो परी।

12हे भायां, म्हारै जिसा बणण री मेहर करौ। देखौ, म्हें ई तौ थारै जिसे बणग्यौ हूं, आ म्हारी प्रार्थना है, अैडो नीं है कै थे म्हारे पेटे कोई गुनौ कर्यौ है। 13थे तौ जाणौ इज हौ कै म्हारी डीलगत व्याधि रे कारण म्हें पैली बार थानै इज सुभसंदेस सुणावौ हौ। 14अर थे ई जद थारी पारखा करीजी ही तद म्हारी मांदगी रे उपरान्त ई थे म्हनै ओछी नीं समझ्यौ अर ना ई म्हनै कोई ओडो दियो। बल्के थे तौ परमेसर रे सुरगदूत रे रूप में म्हारौ सुआगत कर्यौ। जाणै थारी निजरां में म्हें खुद मसीह यीशु इज हौ। 15इण वास्तै थारै उण हरख रौ काई होयौ? म्हें थारै वास्तै खुद इण बात रौ साखीधर हूं कै जे थे देवण में समरथ होवता तौ थारी

आंख्यां तकात काढ'र म्हनै देय देवता। 16तौ कांई साच बोलण'र कारण म्हें थारौ बैरी होयग्यौ?

17थानै वैवस्था रे विधान माथै चलावण री चावना राखणियां थारै मांय गैरी रुचि लेवै। पण वारौ धेय आछौ नीं है। वै थानै म्हासूं अलग करणा चावै। ताकि थे ई वारै मांय रुचि लेय सकौ। 18कोई किणी में हमेस गैरी रुचि लेवतौ रैवै, आ तौ बात आछी है पण आ बात किणी आछै काम सारू होवणी चाईजै। अर खाली उण बगत इज नीं, जदके म्हें थारै सागै हूं। 19म्हारा व्हाला टाबरां! म्हें थारै सारू अेकर फेरूं जापायती वाळी पीड झेल रैयौ हूं, जद तांई कै थे मसीह जैडा नीं व्हे जावौ। 20म्हें चाऊं हूं के अबार थारै कनै आय पूगूं अर थारै सागै नेठाव सूं निरवाळी बातां करूं, क्यूंके म्हनै दियाग नीं लागै कै थारै सारू कांई करणौ रैयौ।

सारा अर हाजरा रौ दाखलौ

21वैवस्था रे विधान रे आधीन रैवणौ चावणियां सूं म्हें पूछणौ चाऊं हूं: कांई थे वैवस्था रे विधान रौ औ कैवणौ नीं सुण्यौ। 22के इब्राहीम रे दो बेटा हा। अेक रौ जलम अेक दासी सूं होयौ अर दूजै रौ अेक सुतंतर लुगाई सूं। 23दास सूं जलम्योडौ बेटौ परकत री परिस्थितियां में जलम्यौ हौ पण सुतंतर लुगाई सूं जकौ जलम्यौ, वौ परमेसर रे कर्योडी प्रतिग्या रौ फळ हौ।

24आं बातां रौ प्रतीकात्मक अरथ है: अे दो लुगायां, दो वाचां री बानगी है। अेक वाचौ सिनै परबत सूं हासल हुयौ हौ जकौ वां लोगां नै जलम दियौ जका गुलामी सारू हा। औ वाचौ हाजरा सूं संबंधित है। 25हाजरा अरब मांय आयोडै सिनै परबत री प्रतीक है, वा अबार यरूशलेम कान्नी संकेत करै है क्यूंके वां आपरै टाबरां सागै गुलामी भुगत रैयौ है। 26पण सुरग में ठावौ यरूशलेम आजाद है। अर वा इज म्हांरी माता है। 27शास्त्र कैवै :

“बांझ! हरख मनाव,

थूं किणी नै नीं जाम्यौ;

हरखनाद कर, थनै जापै री पीड नीं हुयी,

अर हंसी-खुसी में मुळक

क्यूंके छिटकायोडी री अणगिण

औलादां है, उणरी बित्ती कोनी जित्ती

पतिवरता री है।”

यशायाह 54:1

28इण वास्तै भायां, अबे थे इसहाकरै जैडी परमेसर रे वचन री संतान हौ। 29पण जियां उण बगत परकत री परिस्थितियां रे आधीन जलम्योडौ, आतमा री सगती सूं जलम्योडै नै अदावै, वैडी ई गत आज है। 30पण देखौ, पवित्र शास्त्र कांई कैवै है? “इण दासी अर इणरै बेटै नै बारै काढ नांखौ, क्यूंके औ दासीपूत तौ सुतंतर लुगाई रै बेटे सागै उत्तराधिकारी नीं होवैला।”^a 31इण वास्तै हे भायां, आपां उण दासी री संतान नीं हां, बल्कै म्हे तौ सुतंतर लुगाई री संतानां हां।

सुतंतर बण्यारैवौ

5¹मसीह आपां नै सुतंतर कख्या है, ताकि आपां सुतंतरता रौ आणंद लेय सकां। इण वास्तै खुद रे भरोसै नै पकौ राखौ अर पाछौ वैवस्था रे विधान रे झंवडै रौ बोझ मत उठावौ। 2सुणौ! खुद म्हें, पौलुस थांसूं कैय रैयौ हूं के जे खतनौ करा'र थे पाछा वैवस्था रे विधान कान्नी बावडौ हौ तौ थारै सारू मसीह रौ कोई महत्त्व नीं रैवैला। 3खुद रौ खतनौ करावणियै हरेक आदमी नै म्हें अेकर फेरूं चेताऊं हूं के सगळी वैवस्था रे विधान माथै चालणौ जरूरी है। 4थां मांय सूं जिता ई लोग वैवस्था री पाळणा रे कारण धरमी रे रूप में थरपीजणा चावै है, वै सगळा मसीह सूं किनारौ कर लियौ है अर परमेसर री क्रिपा रे खेत्र सूं बारै है। 5पण आपां आपणै भरोसै रे बूतै परमेसर रे सांम्ही धरमी स्वीकारिजण री आस राखां हां। आतमा री सहायता सूं आपां इणरी उडीक राखां हां। 6क्यूंके मसीह यीशु में आस्था सारू ना तौ खतनौ करावण रौ कोई महत्त्व है अर ना खतनौ नीं करावण रौ। उण मांय तौ प्रेम सूं उपजण वाळै भरोसै रौ इज महत्त्व है।

7थे तौ आछी तरै अेक मसीह रौ जीवण जीवता रैया हौ। अबे थारै अैडौ कांई होयग्यौ जकौ थानै साच रे मारग चालण सूं रोके। 8अैडौ कुबध जकी थानै साच सूं भटकावै, थानै बुलावणिया परमेसर कान्नी सूं नीं आयी है। 9“थोडौ”क खमीर गुंध्योडै सगळै आटे नै खमीर सूं उठा लेवै।” 10प्रभु रे पेटै म्हारौ पूरौ भरोसौ है कै थे किणी दूजे मत नै धारण नीं करोला, पण थानै भरमावणियौ चायै कोई हुवै, उणनै दंड अवस मिळसी।

11हे भायां, जे म्हें आज ई, जियां कै कीं लोग म्हारै माथै आळ लगावै कै म्हें खतनै रौ प्रचार करूं हूं तौ

म्हने अजै ताई जातनावां क्यूं दिरीज रेयी है? अर जे म्हें अबार ई खतने री जरूरत री प्रचार करूं हूं, तो फेर तो मसीह रे क्रूस रे कारण उपज्योड़ी म्हारी सगळी बाधावां मिट जावणी चाईजती। **12**म्हें तो फगत आ चाऊं हूं कै जका लोग थानै डिगावणा चावै, वै खतनौ करावण रे सागै-सागै आपरौ बधिया ई कराय नांखता।

13पण भायां, थानै परमेसर सुतंतर रैवण सारू टाळ्या है। पण उण सुतंतरता नै मतैई समूळै सुभाव री पूती वाळी साधन मत बणण दौ, बल्के प्रेम रे कारण आपसरी मांय अेक-दूजे री सेवा करौ। **14**क्यूंके सगळै वैवस्था रे विधान रौ सार-संग्रै इण अेक कथाणै में इज है: "आपरे साथी-सायनां सूं बियां इज प्रेम करौ, जियां थे अपणै आपसूं करौ हौ।"^a **15**पण आपस में कटवीं करता थकां जे थे अेक-दूजे नै खावता-खोसता रैवौला तो देख्या! थे आपसरी में अेक-दूजे रौ इज खातमौ कर नांखोला।

मिनख री परकत अर आतमा

16पण म्हें कैऊं हूं कै आतमा री आंकस मुजब आचरण करौ अर खुद री पापवाळी परकत री इंछावां री पूती मतना करौ। **17**क्यूंके डीलगत भौतिक इंछावां पवित्र आतमा री इंछावां अर पवित्र आतमा री इंछावां डीलगत भौतिक इंछावां सूं उलट हुया करै। आंरौ आपसरी मांय विरोध है। इण वास्तै इज तो थे जकौ करणौ चावौ, वौ कर नीं सकौ। **18**पण जे थे पवित्र आतमा री आंकस में चालौ हौ तो फेर वैवस्था रे विधान रे आधीन नीं रैवोला।

19अबै देखौ! आपां रे सररी री पापवाळी परकत रा कामां नै तो सगळा जाणै है। अै है: व्यभिचार, सगूलवाडौ, भोगविलास, **20**मूरती-पूजा, टूणा-टोटका, बैर-भाव, लडाई-टंटै, दोख, किरोध, स्वारथ, मतभेद, आपसरी में फूट, ईरखा, **21**नसौ, लंपटपणौ या अैडींज दूजी बातां। अबै म्हें थानै आं बातां बाबत बियां ई चेताऊं हूं जियां म्हें थानै पैलां ई सावचेत कख्या हा कै जका लोग अैडीं बातां में रस लेवैला, वै परमेसर रे राज रौ पाट नीं पावैला। **22**जदकै पवित्र आतमा, प्रेम, हरख, सांति, धीरप, रहम, नेकी, विस्वास, **23**कंवळापणौ अर आतम-संजम उपजावै। अैडीं बातां रे विरोध में वैवस्था रौ कोई विधान कोनी। **24**वै लोग जका यीशु मसीह रा है, आपरे पापी

मिनख-सुभाव नै वासनावां अर इंछावां समेत क्रूस माथै चाढ दियौ है। **25**क्यूंके जद आपां रे इण नूवै जीवण रौ स्रोत ई आतमा है तो आवौ, आतमा री इंछा मुजब ई चालां। **26**आपां नै अभिमान नीं करणौ। अेक-दूजे नै नीं चिड़ावणौ अर ना ई आपसरी में ईरखा करणी।

अेक-दूजे री सैयोग करौ

6 **1**हे भायां, थां मांय सूं जे कोई मिनख पाप करतां पकड़ीजे तो थां आध्यात्मिक लोगां नै चाईजे कै स्याणप सूं उणने धरम रे मारग पाछौ लावण रौ काम करौ। अर खुद रे सारू ई इण बात री सावचेती राखौ कै थे ई किणी परीक्षा में नीं पड़ जावौ। **2**आपसरी में अेक-दूजे रे आडा आवौ। इण भांत थे मसीह री वैवस्था री पाळणा कर सकोला। **3**जे कोई मिनख कीं नीं होवता थकां ई खुद नै महताऊ मानै तो समझौ वौ खुद नै इज धोखौ देवै। **4**आपरे करमां रौ लेखौ हरेक आदमी नै खुद नै करतौ रैवणौ चाईजे। इयां कख्यां सूं इज उणने खुद माथै बिना किणी दूजे सूं तुलना कख्यां गुमेज करण रौ मौकौ मिळैला। **5**क्यूंके आपरौ बोझ हरेक नै खुद नै ई उठावणौ है।

जीवण खेत बावण जिसौ है

6जिणने परमेसर रौ वचन सुणाईज्यौ है, उणने चाईजे कै जकी आछी चीजां उणरे कनै है, वां मांय आपरे उपदेसक नै सीरी बणावै।

7खुदोखुद नै मत छळौ। परमेसर नै कोई धरू नीं बणाय सके, क्यूंके जकौ जैडीं बावैला, वौ वैडीं इज काटैला। **8**जकौ आपरी काया सारू बावैला, वौ आपरी काया सूं विणास री फसल काटैला। पण जकौ आतमा रे खेत में बीज बावैला, वौ आतमा रे मारफत अणंत जीवण री फसल काटैला। **9**इण वास्तै आवौ, आपां भलाई रे काम में कदैई पाछ नीं राखां, क्यूंके जे आपां भलाई करता रैवांला तो बगत रे परवाण आपां नै उणरौ फळ अवस मिळैला। **10**इण वास्तै जटै-कठैई मौकौ मिळै, आपां नै हरेक सागै भलाई करणी चाईजे, खास कर'र आपां रे धरम-भायां सागै।

कागद रौ निवेडौ

11देखौ, म्हें थानै खुद रे हाथां सूं किन्ता बडा-बडा आखरां में लिख्यौ है। **12**अैडा लोग जका सररी सूं

^a 5:14 उद्धरण लैव्य व्यवस्था 19:18

आछौ दिखावौ करणौ चावै, वै थारै माथै खतनौ करावण सारू जोर देवै। पण वै अैडौ फगत इण वास्तै कर रेया है कै वानै मसीह रै क्रूस रै कारण जातनावां नीं झेलणी पड़े। **13**क्युंके वै खुद ई जिणां रौ खतनौ व्है चुक्यौ है, वैवस्थारै विधान री पाळणा नीं करै, पण फेरूं ई वै चावै कै थे खतनौ करावौ ताकि वै थारै मारफत इण डीलगत प्रथा नै अपणावण सारू फाळ सांध सकै।

14पण जिणरै मारफत म्हें संसार सारू अर संसार म्हारै सारू मरग्यौ, प्रभु यीशु मसीह रै उण क्रूस रै टाळ म्हनै किणी माथै गुमेज नीं होवै। **15**क्युंके ना तौ खतनै रौ

कीं बट्टै अर ना बिना खतनै रौ ई। जे सार री बात है तौ वा है नूवी स्त्रिस्टी। **16**इण वास्तै जका लोग इण धरम-नेम माथै चालसी वां माथै अर परमेसर रै इझाअेल माथै सांति अर किरपा होवती रैवै।

17कागद नै पूरौ करता थकां म्हें थांसूं अरज करूं हूं कै अबै म्हनै कोई दुख मत देवौ। क्युंके म्हें तौ पैलां ई म्हारी देही में यीशु रै घावां नै लियां घूमतौ फिरूं हूं।

18हे भायां, म्हारै प्रभु यीशु मसीह री किरपा थांरी आतमावां माथै बणी रैवै। आमीन!